
ШУҲРАТ ҒАНИЕВ: ФАРҒОНА ВИЛОЯТИДА 12600 ТА ЗАХИРА ЖОЙ ТАЙЁРЛАНДИ.

Фарғона вилоятидаги сиҳатгоҳлар тиббиёт талабларига жавоб бериши нуқтаи назаридан сараланиб уларда коронавирусга чалинганлар, улар билан алоқада бўлганлар учун 3000 та захира жой тайёрлангани ҳақида аввал хабар берган эдик.

- 1 августга қадар 12 600 та захира жой тайёрлашни режа қилиб олгандик, -деди вилоят ҳокими Шухрат Ғаниев. – Бу вазифа адо этилмоқда. Бунинг учун вилоятдаги хусусий шифохоналар ҳам жалб этилди. Мана бу янги қуриб битказилган тиббиёт шифохонасининг ўзида даволаш учун 70 та барча шароитларга эга жой мавжуд.

Фарғона шаҳри марказида қад ростлаган 3 қаватли шифохонада диагностика, таҳлил лабораториялари, видеомулоқот учун онлайн конференция заллари ҳам мавжуд. У тўлиғича эҳтимолий эҳтиёжни қоплаш учун захирага олинди.

- Вилоятдаги 14 та катта спорт залларида ҳам қайта мослаштириш ишлари якунланяпти. Биргина Фарғона шаҳридаги 8 та спорт саройларида бемор ёки улар билан алоқада бўлганлар учун бир неча минг захира жой ҳозирланди, -дейди коронавирусга қарши кураш вилоят штаби раҳбари, ҳоким ўринбосари Файзулло Қосимов.

Фарғона шаҳридаги Олимпиа заҳиралари коллежининг бир неча спорт заллари бугун хона-хоналарга бўлинган. Ҳар бир хонага кароват, санитария эҳтиёж хонаси, тиббий жиҳозлар ўрнатилган. Шу ернинг ўзига 500 та кислород концентратори ва шунча ИВЛ аппаратлари олиб келинди.

Қўқон шаҳридаги 1-болалар спорт мактаби залида ҳам бемор ёки гумонланганлар учун шу каби хона-жойларни кўрасиз. Қурувчилар қўли-қўлига тегмайди. Зум ўтмай талабга жавоб берадиган ичида санитария хонаси, тиббий жиҳозлар билан таъминланган жойлар қад ростлаяпти.

- Шу ернинг ўзида 600 та, Қўқон шаҳридаги 4 та спорт залларида жами 2000 та бемор учун захира жой тайёрланяпти,- дейди вилоят Маҳалла ва оилани қўллаб-қувватлаш бошқармаси бошлиғи Саидмурод Аминжонов. – Шуни алоҳида таъкидламоқчиманки, барча ҳаражатлар вилоят бюджетининг ошириб бажарилган қисмидаги маблағ ҳисобидан қопланмоқда.

Коронавирус юқтирганлар мамлакатимизда кундан-кун кўпайиб борапти. Тўғри улар сони Фарғона вилоятида нисбатан оз. Лекин бу хотиржамликка асос бўлолмайди. Айни чоқда вилоятда амалга оширилаётган бу каби ишлар ҳавотирланишга ҳам ўрин йўқлигини билдиради. Шундай бўлсада, бу вирусни юқтирмаслик учун шифокор, мутахассислар тавсияларига қатъий риоя қилайлик!

Фарғона вилоят ҳокимлиги Ахборот хизмати

2020-07-28 18:40:29